



MEDIAVERLARING

IS ONDERWYS NOG OP KOERS TE MIDDE VAN DIE PANDEMIE?

Die SAOU het met teleurstelling kennis geneem van die uitstel van die media aankondiging wat die Minister van Basiese Onderwys op Donderdag 14 Mei 2020 sou maak. Die media aankondiging word nou op 18 Mei 2020 verwag. Die hoop is dat die Minister 'n meer omvattende terugvoering aan 'n wagtende Suid-Afrika sal maak met betrekking tot die heropening van skole.

Die terugvoering wat vanaf grondvlak ontvang word is dat sommige provinsiale departemente nog baie ver agter is en dat die moontlikheid vir skoolbestuurspanne om onder veilige toestande terug te keer na skole gedurende die week van 18 Mei 2020 nie maklik haalbaar sal wees nie. Inteendeel, die terugvoering is dat sommige distrikskantore nog nie naastenby funksioneel is nie. Dit impliseer dat die skole wat afhanklik is van sodanige distrikskantore ook nie na 'n hoër rat kan oorskakel nie. Daar is een werksdag van hierdie week oor en die voorsiening van beskermingstoerusting en sanitasietoerusting gaan gewis nie komende Maandag in alle skole wees nie. Skoolbesture verdien nie om so in onsekerheid te leef nie.

Om toenemende onrustigheid in skoolgemeenskappe aan te spreek, verlang skole en opvoeders wat nie antwoorde by die departemente kry nie, antwoorde van die SAOU. Die feit dat die DBO en die provinsiale departemente nie klinkklare antwoorde en leiding kan voorsien nie, veroorsaak vir ander rolspelers onnodige en onbillike verleenthede.

Daar is toenemend druk wat opbou vanaf bepaalde provinsies en skole wat aandui dat hulle gereed is om werksaamhede te hervat en dat die huidige gesloer deur die ander provinsies 'n ernstige stok in die speke is. Soos gestel, hoop die SAOU op meer omvattende en rigtinggewende terugvoering aangaande die huidige stand van sake en die vermoë van die onderwysstelsel om te midde van die pandemie weer aan die gang te kom aangesien opvoeders, ouers en leerders angstig vir leiding nou wag. Die SAOU sal graag terugvoering ten opsigte van die volgende aangeleenthede per provinsie wil verneem tydens komende Maandag se terugvoering deur die Minister:

- Die vordering wat gemaak is met die bekoming en verspreiding van die persoonlike beskermingstoerusting en sanitasie-middels met spesifieke verwysing na maskers, elektroniese termometers en sanitasiepakette. Indien hierdie toerusting nie beskikbaar is nie, sal dit in stryd met die algemene Covid regulasies wees om opvoeders en leerders by skole toe te laat.
- Die voorgestelde protokolle en prosesse vir die hantering van onderwyspersoneel aangesien daar verwag word dat skoolbesture gedurende die week van 18 Mei 2020 moet aanmeld vir diens, maar geen protokolle en prosesse bestaan vir die aanmelding en assessering van onderliggende siektetoestande nie. In dié verband word verwys na:
 - Komorbiditeite;
 - Personeel ouer as 60 jaar;
 - Swangerskappe; en
 - Strawwe rokers.
- Praktiese maatreëls oor hoe skole sosiale distansiëring moet handhaaf. Tot op hede is daar nog geen werkbare voorstelle oor hoe hierdie aspek hanteer moet word nie.

- Die amptelike aangepaste skoolkalender wat per regulasie afgekondig moet word. Saamgelees met die kalender sal dit goed wees indien meerdere inligting met betrekking tot die infasering van die verskillende grade ook voorsien kan word. Daar sal moet verduidelik word hoekom die intervale elke keer twee weke moet wees. Tot en met hede is geen koherente verduideliking nog voorsien nie.
- Terugvoering ten opsigte van die kurrikulum wat per graad en per vak ingekort moet word en versoenbaar moet wees met die kalender en die infasering van die verskillende grade. Dit is gebiedend noodsaaklik dat opvoeders presies moet weet op welke kurrikulum boustene daar gefokus moet word.
- Groot onsekerheid bestaan ook ten opsigte van skoolkoshuise in die lig van die huidige verbod wat op hotelle en gastehuise geplaas word. Sekere skole is afhanklik van skoolkoshuise om te kan funksioneer en tot en met hede is geen leiding in dié verband voorsien nie.
- Voorskoolse inrigtings is 'n belangrike diens in die gemeenskap en die huidige verbod op funksionering maak min sin aangesien werkende ouers wat terugkeer werk toe dringend fasiliteite benodig om na klein kinders om te sien. Dieselfde behoefte bestaan ten opsigte van naskoolsentra.
- Onafhanklike skole ontvang ook min na geen leiding. Dit is noodsaaklik dat daar leiding gegee word aan hierdie sektor ten opsigte van wat hulle regte met betrekking tot funksionering is. Die verskillende provinsies gee teenstrydige antwoorde aan hierdie sektor. Wat die owerhede moet besef is dat hierdie sektor afhanklik is van finansiering deur die ouergemeenskap en dat die grenelstaat 'n baie ernstige negatiewe invloed op inkomste strome uitoefen, en in die proses onderwyspersoneel se voortgesette indiensneming beïnvloed. Uit gesprekke met hierdie skole is dit duidelik dat daar toenemende kommer bestaan.
- Leiding moet ook voorsien word hoe geografiese areas wat as brandpunte van infeksie geag word hanteer moet word in die lig daarvan dat ander areas na vlak 3 kan afskuif.
- Dit is ook noodsaaklik dat daar amptelike regulasies bestaan wat die funksionering van die onderwyssektor sal reguleer. Dit kan nie net aan elke provinsie en distrik oorgelaat word om self te besluit hoe die onderwys se herstelplan geïmplementeer word nie. Daardeur word nie 'n absolute onbuigbare benadering vir skole bepleit nie, maar 'n vaste en gereguleerde raamwerk is noodsaaklik.

Die SAOU het ook bogemelde reeds formeel aan die Departement van Basiese Onderwys gekommunikeer en die wens uitgespreek dat die Minister en die amptenary van die Departement nou leiding moet voorsien aangesien Suid-Afrika wag vir sterk koherente leierskap om opnuut vertroue in die onderwysstelsel te vestig.

Die SAOU weier om as gevolg van veral administratiewe onbeholpenheid op provinsiale vlak met dieselfde teerkwas geverf te word. Die SAOU is nie verantwoordelik vir die huidige staat van onsekerheid en rigtingloosheid nie. 'n Werkbare plan van aksie is al deur die SAOU aan die Departement voorsien om bogemelde kwelpunte aan te spreek. Geen blyke van oorweging daarvan is al ontvang nie.

SAOU
DE VERANDERING IN ONDERWYS
THE CHANGE IN EDUCATION

Do you have any questions?



SAOU is now available on WhatsApp

+27 76 127 1921

#WantOnsGeeOm | #BecauseWeCare

SMS **"DIENS" NA**
071 456 4375
*Normale SMS tariewe geld



SMS **"SERVICE" TO**
071 456 4375
*Normal SMS rates apply

 +27 12 023 1333

SAOU DIENSSENTRUM
SAOU SERVICE CENTRE

saou@saou.co.za 

SAOU
DE VERANDERING IN ONDERWYS
THE CHANGE IN EDUCATION

Het u enige vrae?



SAOU is nou beskikbaar op WhatsApp

+27 76 127 1921